



Aqqalu C. Jerimiassen

UPA 2022/63

Atassut

01. juni 2022

**Meeqqat atuarfianni, inuussutissarsiuutinut, ilisimatusarfimmi il.il. ilinniartut  
ilitsoqqussaralugit kalaallisut oqaatsitik atorlugit inaarutaasumik misilitsittarnissaasa  
allatulluunniit misilitsittarnissaasa qanoq qulakkeerneqarsinnaanera pillugu apeqquteqaat  
aallaavigalugu oqallissiatut siunnersuut.**

(Inatsisartunut ilaasortaq Jens Napaattooq, Naleraq)

Oqaatsitta qanorinnikkulluunniit salliusutut inisisimanissaat Atassummiit  
uparuangassaqartinngilarput.

Oqallissiamilu oqariartutigineqartoq eqqarsaatigissagaanni, oqaatsitta pitsaanerusumik  
atorneqarsinnaaneranik siunnerfeqartoq assortorneqarsinnaanani.

Atassummiit assortunngilarput, ilinniarfigineqarsinnaasut ilaanni nammineq oqaatsitta  
atorneqarsinnaaneranut oqaloqataassalluta ammangatta.

Aap, nalunngilarput oqaatsitta nammineq atoreratigut angusaqarluarsinnaanerput  
piviusorsiorsinnaaqisoq oqaatigissallugu. Taamaattorli, oqaatsininguna arlariinnik piginnaasaqarneq  
tunissut annerpaaq, oqaatsinillu arlariinnik atuisinnaasut tassaakkajuttarmatattaaq qaffasissumik  
inisisimasuusut. Atangulimi uunga paattoornermut una oqaasera saatinneqarani, qallunaatut  
oqaatsit eqqartunnginnakkit kisiisa, nunarsuatsinnili oqaaserpassuit eqqartorakkit.

Ilinniaqqiffinni qaffasinnerusuni, naannerusumik qaffasissumik iliniakkatut ingerlaqqiffiit  
universitetillu eqqarsaatigissangaanni, oqaatsitta kisimiillutik atorneqarsinnaanerat Atassummiit  
piviusorsiortuusorinngilarput.

Nunarsuarmi tamaat eqqarsaatigissagaanni, universitetimut sumulluunniit kandidatimut  
ingerlaqqinniarnissamik siunnerfeqaraanni tuluttut oqaatsit atorneqakkajunnerummata.

Siunissarli ungasinnerusoq isigissangaannittaaq, meeqqat atuarfiani oqaatsitta annertunerusumik  
suli atorneqaleriartornerusinnaanerat oqallisigissallugu Atassummiit piareersimavugut.

Mianersoqqulassili nammineq misilitagarisannik! Kalaalinngorsaanerup annertusinerpaaffiani  
1992-imi atualerpunga, oqaatsillu allat aatsaat 3.klassimi aallartillugit, tassalu qallunaatut, sapaatip  
akunneranut akunnerit qassikattaannannguit. 7.klassimalu aatsaat tuluttut. Suna maanna kinguneraa?  
Uagut ukiuni taakkunani atualertuusugut allamiutut oqaatsitigut atuisinnaanerput annertuumik  
killilerneqarpoq, kalaallisulli allallaqqeqaagut atuillaqqeqalatalu, taannartaa

tulluusimaarutigisinnaavarput. Allatigulli annerusumik nunarsuup sinneranut iluaqutaasinnaaneranut pitsaaqutigisinnaasaanik pinnataqagaanngitsoorpugut.

Sinneratigulli oqallisisssiap suli atorluarneqarsinnaanera, oqaloqatigiinnerullu qanoq ililluta pitsaanerusumik siunnerfeqaqatigiissinnaanerput tunaartalersinnaassuaa. Kukkussutaasarsimasut ukiut siuliini eqqummaariffingalugit.